

四庫全書

史部

# 欽定四庫全書

史部

平定準噶爾方略正編卷二

詳校官監察御史臣 孫家賢

通政使司副使臣 莫瞻菴覆勘

總校官進士臣

朱 鈴

校對官編修臣

周厚 轅

謄錄監生臣

汪 瀾

欽定四庫全書

平定準噶爾方略正編卷一

乾隆十八年冬十一月甲戌

定邊左副將軍成衮扎布奏報準噶爾都爾伯

特台吉策凌及策凌烏巴什等率部衆三千餘

戶來降

成衮扎布奏言據防守烏里雅蘇台叅贊大臣

副都統達青阿報十一月初九日卡倫章京奏

布等文稱有厄魯特巴顏克什克都圖爾噶前來求見詢係都爾伯特台吉策凌與策凌烏巴什所遣因達瓦齊自立後與小策零敦多卜之孫訥默庫濟爾噶爾連歲構兵俱派令率衆相助策凌等惶惑莫知所從因相與計議投誠

天朝以求永遠生聚於十月二十一日由伊犁河起行率部衆三千餘戶來至卡倫今台吉策凌已至博東齊河其策凌烏巴什隨後亦至經卡倫

侍衛布雲布並左右卡倫章京齊克慎等與來  
使夜至博東齊河復遇厄魯特賽奈達什博貝  
等三人稱係台吉策凌等所遣因策凌等率同  
來戶口前赴額克阿喇勒淖爾暫時駐歇特留  
三人候巴顏克什克都圖爾噶回歸同往報知  
布雲布等遂與同行約十里餘見途中老弱男  
婦疲乏馬駝及牛羊甚夥據稱即係續到之人  
察其投降情形屬實因不便遠離卡倫即回至

本處各帶兵丁巡查達青阿聞報即派侍衛蒙  
固勒等前赴塔卜海布拉克扎爾和烏蘭布延  
圖哈瑪爾沙扎海等處卡倫徧傳務令小心防  
範又派公米什克等帶兵二百名前赴卓克索  
偵探但策凌等既在額克阿喇勒淖爾暫歇去  
卡倫甚近恐達瓦齊遣兵來追似應令其進卡  
在扎卜堪珠爾庫珠等處居住或追兵到卡應  
飭卡倫侍衛等以從前定界並無不留降人之

約曉示阻止臣等伏思策凌等歸命投誠情形  
雖確然準夷追逐自宜預防其達青阿所呈已  
飭令辦理復令副將軍貝勒策登扎卜將派備  
之兵保護游牧又就近將賽音諾顏部落及圖  
謝圖汗部落所備之兵共派出一千名令副將  
軍公格勒克巴木丕勒與扎薩克鎮國公恭格  
敦丹及巴圖孟克等帶往烏里雅蘇台駐防接  
應奏入

上諭軍機大臣曰定邊左副將軍成袞扎布等奏報  
準噶爾都爾伯特台吉策凌策凌烏巴什等率所  
部三千餘戶來降暫駐於額克阿喇勒遣使相聞  
已將軍營預備各游牧之兵調遣防範朕觀策凌  
等來降似非叵測何也達瓦齊與訥默庫濟爾噶  
爾構兵不已俱令策凌等相助兩家勝敗既難預  
定即幸而所從者勝亦仍受其約束自不若歸降  
大國冀得安生伊等既經來至卡倫將情事實告



應即令其入內休息可速傳諭成衮扎布即遣軍  
營明白歷練大員前往曉諭告以爾等率衆投誠  
業經奏聞大皇帝大皇帝念爾等俱準噶爾台吉  
大員率領部衆輸誠向化甚可嘉憫今所駐額克  
阿喇勒乃我卡倫外地倘有追兵至此未便應援  
或有所失朕心深為不忍即可移入卡倫駐劄今  
冬將軍成衮扎布來京伊等自必懇求赴京瞻仰  
朕躬即將策凌策凌烏巴什及其頭目酌帶數人

同來從前準噶爾台吉阿喇卜坦丹濟拉等投誠俱封以顯爵優加賞賚其宰桑及部落人等皆授官分產至今安居樂業伊等入見後朕自格外加恩此時先命成袞扎布動用官項牛羊賞給伊等以為接濟其駐牧處所另行酌定至準噶爾素稱狡詐固宜派兵防範但伊等天性好疑亦不可啓其猜嫌倘策凌等願留卡外居住我雖預備無庸宣露若已入卡倫則更無可疑不須過為防範今

特遣侍郎玉保馳驛前往并加恩將朕所用元狐  
帽賞給策凌策凌烏巴什各一頂端罩各一件成  
衣扎布可即遵旨辦理

臣等謹案都爾伯特台吉策凌策凌烏巴什  
等率領部衆輸忱効順其時準夷内外交訌  
時勢已屬瞭然將軍等未能深悉情形猶議  
調兵防範我

皇上於甫經奏到即燭其向化之誠傳

諭移入卡倫資之游牧封爵賞賚備沐

渥恩厥後阿睦爾撒納內面來歸軍前大臣復議令  
將兵壯屯駐軍營而移其妻子於戈壁之內  
措置尤為未協屢蒙

嚴旨切責籌辦悉協機宜蓋以新附之人心懷疑慮  
非坦然示以大公既無以示無外之模亦難  
以收羣策之力也自是聞風請命絡繹偕來  
舉數十萬窮蹙無歸之人咸出水火而登衽

席其感激圖報踴躍從戎固不待領兵深入  
而地勢之險要人情之向背無一不批卻導  
竅赴會投時皆仰賴

聖主如天覆幬之恩有以潛運密移於不覺孰謂遐  
荒異域獨不可信孚而誠感哉

丙子

定邊左副將軍成衮扎布奏報策凌烏巴什等  
移入卡倫賞給安置事宜

成衮扎布奏言據達青阿報藍翎侍衛布雲布等文稱十一月十一日巴顏珠爾克卡倫章京秦布來告稱厄魯特策凌烏巴什在博東齊河遣使相聞因即時起程前至其地策凌烏巴什出迎先跪請

大皇帝萬安並告稱我兄策凌前赴伊蘭僧庫爾因其地險阻雪大難行今將部衆暫分欲進巴顏珠爾克博托和尼卡倫居住當即告知伊等前

蒙將軍傳示準噶爾部人若大隊來歸令其於卡倫外候信若欲入卡亦令暫駐僻處候示辦理據策凌烏巴什告云我等理應在卡倫外候信但天寒雪大倘有追兵前來疲乏不能行走請得入卡無論何處俱可靜候於十二日黎明策凌烏巴什即移至卡倫前博爾濟河駐歇其所領一千二百戶人丁牲畜一時難以查察惟詢明台吉策凌烏巴什及其母妻子女年歲俟

策凌到後再行詳查因公同酌議安插於內卡  
外庫卜克爾之地并請將軍臺米石一百餘斛  
及就近湊辦牛羊給發接濟臣等前於八月初  
四日哨獲自準夷脫出之蒙古額楞達什告稱  
台吉策凌有來降之信曾經奏請遵照乾隆十  
六年

諭旨以降人若求入卡倫自可加恩接濟今策凌等  
來降屬實恐有追兵自應防範已劄行達青阿



與副將軍格勒克巴木丕勒帶兵一千名輕裝  
前赴扎卜堪等處駐劄給與一月糧餉仍俟策  
凌等到日詢問酌量派遣入京至給發接濟口  
糧牛羊應俟伊等人數全到再為辦理

成袞扎布又奏言據達青阿報藍翎侍衛布雲  
布等告稱十一月十三日厄魯特策凌率其妻  
子部落前至卡倫合計策凌烏巴什同來部衆  
共三千一百七十七戶台吉五員喇嘛二百九

十三名同來滿洲漢人共五十名所攜馬駝牛羊頗多已派協理台吉朗袞扎卜侍衛敦多卜撫慰伊等歸命

天朝情殊可憫并著朗袞扎卜將同來滿洲內酌帶數人先回有陸續投誠者倘已疲乏難行即給與口糧令其歸入部落并通飭三十三卡倫等語臣等伏思準夷內亂台吉策凌等歸誠

聖主自當預籌接濟應請酌派四部落牲畜令達青

阿交與策凌等酌量賞給此時正值天寒暫令  
在烏里雅蘇台度歲俟春和雪化從容移至呼  
倫貝爾等處游牧居住奏入

上諭軍機大臣曰據成衮扎布奏台吉策凌策凌烏  
巴什已入卡倫朕昨遣玉保撫慰此時尚不能到  
觀伊等急求入卡其誠心愈益可見著傳諭成衮  
扎布令其即派大員接應至來降之台吉自宜暫  
緩來京約束部衆先將伊等大員輕騎減從帶領

前來其餘仍遵朕前旨行

十二月丙戌

命傳諭降人未經出痘者不必來京

上諭軍機大臣曰朕昨遣侍郎玉保往諭策凌等今思伊等曾否出痘之處未經諭及可傳諭成衮扎布俟策凌策凌烏巴什到軍營時即行傳諭伊等遠來歸誠必急於瞻仰朕躬但蒙古部落中未經出痘者甚多京城氣候與邊塞不同伊等到此即

傷一僕從朕心亦為不忍著將伊等及所部詳悉  
詢明曾否出痘再行酌量同來不可忽略況明年  
夏令朕巡幸熱河其地較京城涼爽若今冬未得  
前來將來自可於彼處瞻仰更與入京無異斷勿  
汲汲赴京轉負朕矜恤之意將此明白曉示至伊  
等現駐烏里雅蘇台俟來年移居呼倫貝爾一應  
事宜著成衮扎布來京之日會同軍機大臣定議  
具奏

丁亥

定邊左副將軍成衮扎布奏報策凌等進獻馬匹並言語情形

成衮扎布奏言達青阿報十一月二十三日投誠台吉策凌率台吉塞卜騰班珠爾宰桑美諾克瑪什等及策凌烏巴什所屬宰桑巴圖哈什哈桑阿扎卜得木齊巴顏克什克等并隨從三十餘人望

闕跪請

皇上萬安告稱我等台吉宰桑備馬十二匹恭進  
大皇帝又同來滿洲蒙古漢人共一百名理合報出  
遂同策凌等列坐告以我

朝定制扎薩克以上王貝勒貝子公等始得進貢  
皇上以下官員並無獻馬之例念爾等遠人誠心歸  
順自當代為奏明並詢明策凌為都爾伯特台  
吉錫第之子策凌烏巴什為達賴泰什之子原

係一姓今已疎遠因達瓦齊自立後與訥默庫濟爾噶爾爭鬪俱調遣伊等相助是以歸誠

聖主求得安生於本年十月二十一日由額爾齊斯河起程沿途並無追兵亦未遇風雪惟在準噶爾東界之烏蘭嶺烏英齊博東齊等處掠取牲畜而來又問策凌等如有追兵來時從何取道應有何人統率據稱現在伊等攻戰之際未必得暇來追倘有追兵惟噶爾藏多爾濟尚有兵



萬餘或能前來但我等來路水草俱盡或從科  
卜多布延圖卓克索一路而來亦未可定至達  
瓦齊現在相助之人惟阿睦爾撒納及噶爾藏  
多爾濟二人尚屬才能其宰桑中如圖魯虎雖  
曾經戰陣業已年邁鄂勒錐巴哈曼集俱未諳  
練又有衮布聞已為訥默庫濟爾噶爾所殺再  
策凌等親屬中尚有策凌烏巴什之姪訥默庫  
所屬一千戶其近族台吉有額爾德尼巴圖博

羅特剛多爾濟三人所屬約有千戶倘得便亦必前來投誠至問以達瓦齊與訥默庫濟爾噶爾強弱勝敗之處據稱訥默庫濟爾噶爾之兵較達瓦齊為強如達瓦齊兵敗自必投順

天朝并詢明現在策凌等俱未出痘不便即令入京或將伊台吉宰桑內選派三四人於十二月初一日自軍營由驛起程其策凌等所報滿洲蒙古漢人一百名及進獻馬匹應如何辦理再副

將軍貝勒策登扎卜率部衆一千名情願効力  
應否支給一月錢糧候

旨遵行臣等伏思策凌等輸誠向化甚為恭順自應  
加意撫納並申飭各卡倫小心防範其酌辦伊  
等來京之處或將曾經出痘者傳至軍營伺候  
所進馬匹俟來春解交上駟院再策凌等所云  
倘有追兵或係噶爾藏多爾濟雖未足為憑亦  
當先事預防其策登扎卜呈請効力兵一千名

既在烏里雅蘇台預備策應似為有益應酌量  
給與一月錢糧米石奏入報

聞

定邊左副將軍成衮扎布奏報準噶爾宰桑瑪  
木特來追策凌闌入卡倫

成衮扎布奏言達青阿等報十一月二十六日  
貝子車木楚克扎布文稱準噶爾宰桑瑪木特  
帶兵二百來追策凌當經巴顏珠爾克卡倫侍

衛布雲布等前赴博爾濟河與瑪木特相遇令其於塔布圖外暫候俟報知軍營候示而瑪木特急期追獲即行進卡又於本日車木楚克扎布報稱據卡倫護軍伊靈阿等從瞭望處見烏梁海十餘人告稱我台吉噶爾藏多爾濟率兵二千在博托和尼暫歇即來追策凌後有阿睦爾撒納率兵三千亦二三日內可到且望見博托和尼西北山麓多有火光恐分途並進均未

欽定四庫全書

平定準噶爾方略正編

十四

卷一

可定祈速為發兵應援臣等即劄行達青阿與  
貝勒策登扎卜公格勒克巴木丕勒等領兵前  
往庫克嶺等處會合車木楚克扎布密告策凌  
等遷移游牧果有追兵相機戰守以逸待勞自  
可無虞惟是軍營馬匹最要臣等謹遵前降  
諭旨由官購馬駝內酌撥馬六千匹駝三千隻預備  
應用奏入

上諭軍機大臣曰據成衮扎布奏稱準噶爾宰桑瑪

木特來追策凌既經阻止復強入我卡倫其後噶  
爾藏多爾濟等又有來追之信已就近調遣預備  
兵丁先以理曉示再為相機辦理等語所辦尚合  
機宜但準噶爾人等若遵行和好應在卡倫外聲  
明緣由靜候處置乃我卡倫人等阻止瑪木特並  
不遵行直入內地是大輕視我兵如入無人之境  
矣不惟國家大體攸關亦衆喀爾喀部落聲名所  
係理應相機擒剿又何必以和好為言夫卡倫乃

欽定四庫全書

平定準噶爾方略正編

卷一

十五

邊陲定界彼此不可相踰今瑪木特既直入無懼  
倘仍聽其自行回巢則將來準夷得志必至漸生  
覬覦出入無忌近日準夷內亂堂堂天朝固不肯  
乘釁發兵攻取若窮蹙來降之人朕為共主豈忍  
不容留養育使策凌等在卡倫外為瑪木特追及  
尚可不必往援今已入卡倫而瑪木特冒昧恃強  
儼然挑釁豈可輕縱成衮扎布等既經派兵策應  
伊等或知斂跡尚可徐觀動靜倘恣肆妄行自當



以逸待勞盡為勦絕且瑪木特帶兵二百直入之時若果即為擒獲羈候則續來之人自不敢逞此時作何辦理速行具奏侍郎玉保頗悉準夷情事著在參贊大臣上會同將軍等相機酌辦前鋒統領努三散秩大臣薩喇爾並著在叅贊大臣上行走速行前往協同辦理隨

命尚書舒赫德前赴鄂爾昆軍營辦理事務並揀選索倫烏拉齊侍衛章京拜唐阿兵丁等二十人

隨同差遣各賞棉甲一領並整裝銀兩有差

己丑

上諭軍機大臣曰準噶爾瑪木特以二百人闌入卡倫甚有輕視我兵之意若不加以懲創將來噶爾藏多爾濟阿睦爾撒納必愈恣放肆如入無人之境是邊界駐劄兵丁徒有虛名何以保護喀爾喀耶在守卡兵丁僅二三十名豈能以理曉諭阻止二百之衆成袞扎布達青阿等即應派兵擒勦何

以姑息玩愒至此可將現在如何辦理之處速行具奏將來瑪木特即束手就擒告求歸順亦非策凌等可比仍應看守請旨或伊自度兵力微弱逸出卡倫亦必盡為搜捕不得寬縱至噶爾藏多爾濟等倘或繼來諒成衮扎布等自必預為籌備看此情形事已不可中止非應虛言和好之時我卡倫游牧必須速移內地使賊毫無所犯其新來歸降之人一切安撫事宜更為切要可傳諭成衮扎

布等知之

庚寅

上諭軍機大臣曰瑪木特來追策凌闌入卡倫卡倫官兵雖少但成衮扎布已遣貝子車木楚克扎布公米什克領兵駐於巴顏珠爾克等處防禦追兵若遇瑪木特等何難擒勦又成衮扎布奏稱達青阿與策登扎卜已領兵前往庫克嶺等處相機戰守果否親往及與瑪木特相遇如何辦理之處可

傳諭伊等速行奏聞

壬辰

定邊左副將軍成衮扎布奏報瑪木特逸出卡倫

成衮扎布奏言達青阿報據卡倫侍衛等文稱  
準噶爾宰桑瑪木特追逐策凌等自進卡以來  
並不敢深入內地晝夜藏匿旋即陸續出卡潛  
回游牧當即派章京兵丁等前往瞭望尋踪伊

等或全行回巢或逃往別處現在確查至所稱  
噶爾藏多爾濟等領兵前來是否虛實亦派賢  
能台吉官兵探明申報臣等仍飭達青阿於各  
汛防地方用心防範堵截以備不虞奏入

上諭軍機大臣曰成衮扎布等奏稱瑪木特闖入卡  
倫近又畏我有備潛行逸出等語前據達青阿等因  
防範追兵已派貝子車木楚克扎布公米什克  
帶兵三百名往巴顏珠爾克博托和尼溝中間堵

截續經成衮扎布派格勒克巴木丕勒兵一千名  
前往策應又就近派兵一千名協助是現在兵力  
不為不多瑪木特如此任意出入既未曾擒勦於  
前又不能追逐於後視同烏有殊為駭異達青阿  
現駐卡倫近地何不相機辦理夫卡倫如門戶然  
豈容闢入今瑪木特又經回巢聽其出入不加懲  
創可乎此時準夷內亂之秋尚如此恣肆數載後  
或養精蓄銳侵犯卡倫其何以保我喀爾喀耶達

青阿等既曾領兵防範即著迅速前往或以計取  
或以力攻若不能擒獲瑪木特伊尚何顏復返其  
駐防烏里雅蘇台著烏爾登前往至成衮扎布於  
瑪木特出入之際並未籌及擒勦方略然則將軍  
職掌但須查取信息據文奏報已乎著嚴行申飭  
今命尚書舒赫德前往軍營一應機宜與伊等商  
酌辦理

己亥



恩免哈密回民賽巴什達里雅田租

上諭軍機大臣曰從前哈密賽巴什達里雅屯田給  
令該處回子耕種所收穀石以四分交官六分給  
與回子今聞伊等生計稍艱著加恩將每年耕種  
所獲穀石不必交官全行賞給

庚子

命傳諭陝甘總督永常預籌夷使事宜

上諭軍機大臣曰永常奏稱準夷貿易之期將屆請

仍舊暫為官辦照例動帑預備等語看來可不必先期預備此時達瓦齊與訥默庫濟爾噶爾彼此構兵應無暇計及貿易但夷人有利必趨或仍循往例遣使前來哈密亦未可定可傳諭永常令其即行却回并曉以從前加恩噶爾丹策零是以准其按年貿易嗣策妄多爾濟那木扎爾暨喇嘛達爾扎乃噶爾丹策零之子今達瓦齊非其族類且由殺奪而得又並未遣使請安何得仍循往例况

近日瑪木特前來北路關入卡倫繼復畏懼逃回  
現在遣人前往究問若達瓦齊知犯界非理縛獻  
自贖並遣使奏明或可仍准貿易此時不當遽許  
如來使不肯即回宛轉求請即應剴切曉諭俾知  
恩不可以倖邀倘在邊生事即與賊人犯境無異  
自當相機擒捕不得聽其猖獗著傳諭永常妥協  
辦理務合機宜

乙巳

訓諭安西提督王進泰

上諭軍機大臣曰王進泰奏哈密毗連夷壤北路既有準夷大隊來降倘再有向西路來降夷人或準夷追逐抵我卡倫均未可定現在密飭各卡弁兵嚴加防範如遇大隊逃夷即阻留卡外詳辨真偽倘有追兵自當宣諭我皇上施恩和好不便收留之處明白曉諭聽其自便若無人追逐查詢屬實務須安置僻處拘其器械馬匹等語此奏所見甚

小撫馭外夷之道全在隨時籌酌相機辦理從前  
策妄多爾濟那木扎爾及喇嘛達爾扎皆噶爾丹  
策零之子是以准其遣使入覲今彼中紛爭構釁  
皆篡殺之人達瓦齊又非其族類何屑以和好為  
言其所屬夷人避亂投誠乃窮蹙來歸自當收留  
安置何必阻諸卡外絕其內附之心如或引兵來  
追即當守我卡倫無令闌入至所請投降人等拘  
其器械馬匹此向來綠旗小見飾詞既許其內屬

自不當示以猜疑使之駭懼看來王進泰不過小心謹慎之人於邊務機宜未能仔肩重任已傳諭永常於明年夏秋間親往安西節制調度現在瑪木特闌入北路卡倫不得不遣人究問已命舒赫德等前往軍營相機辦理所有先後情節王進泰未能稔知著將北路軍營奏摺并所降諭旨一併錄示王進泰知之

戊申

定邊左副將軍成衮扎布覆奏籌辦擒勦瑪木  
特事宜

成衮扎布奏言臣等奉到十二月十二日

諭旨即嚴飭叅贊大臣達青阿由現駐烏里雅蘇台

三千兵丁內挑選一千名同車木楚克扎布米

什克帶領相機擒勦瑪木特臣等與副將軍格

勒克巴木丕勒叅贊貝勒額林沁等領兵一千

策應但時值隆冬前往阿爾台等處馬力必須

充足請於官備馬六千匹駝三千隻內選馬二千匹駝一千隻送至烏里雅蘇台接濟再駐防兵丁向有錢糧其策應之兵請酌量撥給兩月錢糧俟選撥齊全即令起程前往奏入報

聞

庚戌

侍郎王保奏報策凌等言語情形

王保奏言臣於十二月初十日由塔米爾起程



十七日至察罕廋爾扎卜堪遣人傳知來降台  
吉策凌策凌烏巴什及宰桑等齊集策凌等各  
率所部於十里外迎接恭請

聖主萬安臣等十一月二十三日所奉

諭旨宣示隨以

恩賜策凌等冠服傳

旨賞給並告伊等云我到來後蒙

聖主恩諭爾等未經出痘者不必入京令將軍等曉

示想已知悉策凌等跪泣云噶爾丹策零時我等即思歸順

大皇帝其時法令頗嚴人心未變今達瓦齊等構兵無已俱來調遣不得安生是以歸命

大皇帝久思瞻仰

天顏旋蒙將軍等傳奉

諭旨以口內炎熱我等未經出痘者多若傷一僕從聖心亦為不忍誠不勝欽感今酌派曾經出痘宰桑

和通巴顏克什克及策凌烏巴什宰桑哈錫塔  
策凌孟克宰桑巴圖等十人預備瞻仰

大皇帝天顏我等螻蟻微生毫無補報荷蒙  
恩賜衣帽頂戴無極但未得瞻仰

大皇帝心實不安懇祈代奏於明年

聖駕巡幸熱河時俾得遂瞻仰之願等語臣因傳  
諭以明年入覲

行在必加爵賞策凌等合掌叩首並詢知策凌年五

十六歲策凌烏巴什年二十五歲又有族叔策凌孟克因管理巴玉特台吉事務故率班珠爾塞卜騰等十台吉屬下來投

大皇帝其塞卜騰約會各部更著勤勞祈為轉達

天聰臣即令其將策凌孟克所領戶口數目開列策

凌孟克告稱我所領七百十一戶所屬只一百

十四戶餘俱巴玉特台吉屬人臣伏覩策凌等

感戴

聖恩殊為恭順已著派宰桑和通等四人隨從六人送至塔米爾預備起程或臣親身帶領於正月十一日前後到京或委員護送俟與成衮扎布商酌辦理奏入報

聞

乾隆十九年春正月癸丑

定邊左副將軍成衮扎布奏報侍郎玉保帶領宰桑和通等於十八年十二月二十五日自軍

營起程赴京入

觀

壬戌

尚書舒赫德奏報分路調遣查拏瑪木特等事  
宜

舒赫德奏言臣於十八年十二月十八日自京  
起程十九年正月初三日至軍營會同將軍成  
袞扎布等將烏梁海闌入卡倫情形與卡倫侍

衛前後呈報文書細加查看始知闌入卡倫者  
非止烏梁海尚有準噶爾厄魯特得木齊烏巴  
什赤倫哈什哈等應盡行查拏辦理查厄魯特  
與烏梁海等原從兩處卡倫而入合於一處今若  
先後查拏我兵已出卡倫聲勢張揚必致鼠  
竄應將我兵亦分兩路令努三薩喇爾等帶兵  
五百名查拏烏梁海瑚圖克等並行文達青阿  
等將現帶兵一千名內挑選五百名查拏厄魯

特瑪木特得木齊烏巴什等又派叅贊大臣烏爾登喀爾喀副將軍策登扎卜帶兵五百名出卡倫接應叅贊大臣安崇阿帶兵五百名於附近卡倫接應現今邊上駐兵三千兩路共調兵二千僅餘一千放牧馬匹看守營寨外其勢稍弱臣等於鄂爾昆預備之貝勒策卜登所領兵一千西喇烏蘇地方預備之副將軍得親扎卜郡王齊巴克雅喇木丕勒所領兵一千盡行調



至與貝勒策卜登等帶往烏里雅蘇台就近助  
威駐劄奏入報

聞

乙丑

議安插降人事宜

尚書舒赫德等奏言查得來降之策凌策凌烏  
巴什策凌孟克等應指與游牧地方但準噶爾  
之人以種地為業不似喀爾喀蒙古賴畜牧度

日今若令住於推河等處與喀爾喀一同牧放  
伊等人衆不得種地不善牧放殊於生計無益  
查呼倫貝爾地方與喀爾喀車臣汗之地連界  
不但可以種地亦有牧放牲畜之處請即令住  
此處將喀爾喀游牧向內略加移徙於新降之  
衆久遠有益奏入得

旨軍機大臣議奏尋議厄魯特人等雖知耕種究賴  
牲畜度日並非全恃田土種作前呼倫貝爾地

方議令安插歸順厄魯特人等行查該將軍經傳爾丹奏稱該處駐劄索倫新巴爾虎厄魯特等人口繁庶牧場牲畜已經孳生若令陸續再往居住實恐地方狹窄今策凌等戶口甚多呼倫貝爾地方勢不能容查從前丹津阿喇卜坦歸順時安插推河洪郭羅阿濟爾罕等處後因茂海巴濟等逃歸準噶爾方將塞卜騰旺布等移居喀爾喀河等處推河洪郭羅阿濟爾罕地

方寬廣水草充足若令策凌等居住似為有益  
但該處現在有無游牧臣等未能懸擬今既奉  
旨派玉保麒麟保前往辦理安插事宜應俟伊等到  
軍營之日會同舒赫德將軍大臣等查明定議  
奏

聞辦理奏入

上從之

丁丑

尚書舒赫德等奏報參贊大臣達青阿誘擒瑪  
木特解送京師

舒赫德等奏言參贊大臣達青阿往拏擅入卡  
倫之賊瑪木特先遣侍衛齊克慎蒙固勒等偵  
探信息於正月十六日遣人誘致瑪木特達青  
阿設計令護軍校德明侍衛布雲布等於瑪木  
特來路安設二卡倫守候令公米什克護軍伊  
靈阿等各帶領馬步兵埋伏齊克慎等帶領瑪

木特在薩拉布拉克卡倫之外引至達青阿住處遂將瑪木特等三十五人悉行擒獲臣等查問明白即行押解赴京但瑪木特係準噶爾守界之人被我兵擒獲伊等不知瑪木特擅入卡倫情由或遣人索取亦未可定現今烏爾登將原帶兵五百名在卡倫附近緊要地方防範居住將達青阿等撤回奏入

上諭之曰從前降旨原令達青阿領兵前往詢問瑪

木特蘭入卡倫情由應以理責其進卡之罪倘呼之不至或至而心懷不服有所抗拒即以兵力擒拿今但遣一使曉諭而瑪木特即親身前來並無抗拒情形達青阿設計誘擒辦理非是且蒙古人內名瑪木特者甚多並不詢其孰假孰真更極舛錯達青阿著來京候旨瑪木特恭順聽命著從寬免其從前冒昧入卡之罪賞給盤費釋放回巢隨

命侍郎玉保於前赴軍營之便中途遇瑪木特解送

金定四庫全書  
卷一  
赴京即行傳

旨宣諭釋放尋王保奏稱於鄂倫瑚都克第八臺遇  
見侍衛富德等解送瑪木特前來宣諭

恩旨賞給衣帽瑪木特泥首謝

恩即行帶回軍營釋放奏入報

聞

二月甲申

命前鋒統領努三為叅贊大臣



丁亥

準噶爾部人伯勒克率衆來降

命賞給安插如例

庚寅

尚書舒赫德等奏報叅贊大臣薩喇爾等擒獲  
擅入卡倫之烏梁海扎木叅等解送京師

舒赫德等奏言正月二十五日薩喇爾努三等  
拿獲擅入卡倫之烏梁海得木齊扎木叅瑚圖

金史卷一百一十五  
克等於三十日解至大營臣等即交與侍衛楊格等解送京師於二月初一日自扎卜堪起程奏入得

旨薩喇爾等擒獲烏梁海扎木叅等不必送至京師著於烏里雅蘇台牢固圈禁俟烏梁海事定再行具奏辦理復

諭軍機大臣曰據尚書舒赫德等奏稱薩喇爾領兵前往科卜多地方薩喇爾擒得準噶爾烏梁海

得木齊扎木叅收凌伯克博羅特等努三亦將得  
木齊瑚圖克擒獲薩喇爾感戴朕恩遵奉指示領  
兵前往烏梁海擒獲扎木叅等無忝任使甚屬可  
嘉若如達青阿誘擒瑪木特則甚虧大國體統矣  
薩喇爾著加恩補授內大臣努三去時原有畏葸  
之意曾降旨訓飭此次擒拿瑚圖克尚屬奮勉自  
可寬宥前愆貝勒額林沁公恭格敦丹策登薩木  
丕勒等協同効力亦屬可嘉著交部議叙

丁酉

命軍營大員有事自行封進無庸詳報將軍轉奏

尚書舒赫德等奏報招諭烏梁海情形

先是有

旨令將軍大臣等於薩喇爾等查拏瑚圖克等之便  
招諭準噶爾烏梁海如未投順即行驅逐於阿爾  
台以外至是舒赫德等奏言據叅贊大臣薩喇爾  
文稱二月初一日我等放回之收凌朔岱訥庫

勒等十人得領被擒之得木齊扎木參等兄弟  
妻子赴軍營告稱收凌朔岱放回時向宰桑雅  
爾都得木齊阿茂海告知扎木參等因擅入卡  
倫大兵前來擒拏如知罪投順即奏明

大皇帝令住原游牧處加恩安撫如不投順則逐往  
阿爾台以外阿茂海差人告知五宰桑一面安  
慰驚慌之烏梁海等一面令收凌朔岱同訥庫  
勒等來見大人懇請如逐往阿爾台以外則我

等無游牧之地今情愿投順懇令在烏蘭古木  
至克木克木齊克地方居住我等向訥庫勒等  
云汝等誠心投順即進我卡倫在特斯河游牧  
若在克木克木齊克地方居住乃卡倫外地倘  
有追兵難以照看據訥庫勒又再三懇求不願  
在特斯河游牧我等因向訥庫勒云汝速回告  
汝宰桑如欲投順親自前來不則即將汝等驅  
逐阿爾台以外如此諭遣而去臣等竊思伊等

宰桑並未前來只差訥庫勒等傳語又將自烏  
蘭古木至克木克木齊克地方居住之說再三  
固請克木克木齊克乃與阿爾台北面烏梁海  
居住相近在我卡倫之外是雖有投順之名轉  
與伊等烏梁海一處居住觀此則伊等非真心  
投順可知續又據薩喇爾文稱烏梁海等知我  
兵在卡倫切近雖有投順之心實懼兵威遲疑  
不進亦未可定且據卡倫侍衛告稱阿睦爾撒

納有來降之信烏梁海等亦皆知此事我等公  
同商議將兵向內緩撤於卓克索地方揀形勢  
處劄營居住卓克索乃各路總口烏梁海若前  
來投順辦理甚易并接應阿睦爾撒納邀截追  
兵一切皆便已於二月初四日自科卜多河口  
起身前往卓克索等語臣等又將各處卡倫侍  
衛呈報文書一一查看大約烏梁海等聞達瓦  
齊復作台吉未肯投順又因懼我兵威紛紛避



匿一時難以收服臣等酌議此處烏梁海宰桑都塔齊鄂哈什等與準噶爾烏梁海連界居住年久彼此互相往來若遣人令都塔齊等明白曉諭準噶爾烏梁海等仍一面令薩喇爾等領兵驅逐如此庶可全行收服奏入

上諭之曰據舒赫德等奏準噶爾達瓦齊復作台吉烏梁海等不願歸順一時難以收服已令薩喇爾暫住卓克索地方宣揚兵勢另籌辦理等語舒赫

德等前後所奏情形竟未諭辦理事之旨朕不解舒赫德何以至此前令將烏梁海收降招服者非因達瓦齊訥默庫濟爾噶爾彼此構釁乘亂而始辦也特因烏梁海等追逐策凌直入我卡倫若不懲治必致肆意妄行且烏梁海等亦緣近處阿爾台之內故得侵犯我卡若驅之於阿爾台之外雖欲侵犯豈能猝至是以令於此時或許歸降或行驅逐一經辦定於地方長久有益原與達瓦齊

之復作台吉與否全無關涉無論此時達瓦齊與  
訥默庫濟爾噶爾內亂之時即使噶爾丹策零尚  
在遇此機會亦當為廓清地方從長辦理更有何  
疑朕曾降旨軍營將軍大臣毋得偏執己意致令  
薩喇爾辦理周章今觀此奏豈非故掣其肘乎若  
謂薩喇爾馬力疲乏即令其在駐劄處暫為休息  
未始不可達瓦齊復作台吉之處何必齒及此尤  
朕所不解也再瑪木特已經釋放伊若感恩自必

來歸如不歸誠必將此事告知伊台吉其台吉豈肯晏然即已勢必遣使前來索取逃人策凌等彼時非發兵征討更無善策在舒赫德等以為既將瑪木特釋放若扎木叅等亦照此釋放便可無事獨不思堂堂天朝有如是辦理之法乎今準夷正值力弱舒赫德尚如此畏怯若遇彼猖獗時伊等不過收入喀爾喀一籌莫展而已俟烏梁海辦竣之後瑪木特若不來歸亦必一律辦理今應如何

防範瑪木特之處亦宜預為留心此時惟遵朕屢次所降諭旨飭諭薩喇爾悉心妥辦舒赫德尚再行從中阻撓決不寬恕其罪

癸卯

命揀選察哈爾兵及新降厄魯特等發往軍營調遣上諭軍機大臣曰內大臣薩喇爾向尚書舒赫德寄信轉奏請派厄魯特兵五百名或一千名發往軍前調遣此次薩喇爾辦理招諭驅逐烏梁海事務

頗屬奮勉但軍營將軍大臣等劄付不合機宜以致薩喇爾等辦理掣肘亦未可定厄魯特策凌等新降之人即行調遣亦無不可然其游牧尚未指定伊等內倘有無知小人或致逃竄於事無益著舒赫德會同薩喇爾策凌策凌烏巴什等商議將伊屬下最可信之塞卜騰等台吉宰桑酌派數員領兵一二百名再令御前侍衛永柱會同總管阿敏道揀派察哈爾八旗兵五百名帶領交與薩喇

爾為招諭驅逐烏梁海之用今春馬匹臆欠之時  
雖不可急行但薩喇爾係熟悉此路之人相機行  
事務期迅速成功不必照將軍大臣等所飭固執  
而行將此傳諭薩喇爾知之

乙巳

準噶爾烏梁海庫本來降

命賞給安插如例

平定準噶爾方略正編卷一



欽定四庫全書

平定準噶爾方略正編卷二

乾隆十九年春三月壬子

尚書舒赫德等奏辦烏梁海事宜

舒赫德等奏言臣等前令烏梁海宰桑都塔齊  
前往招諭準噶爾烏梁海今據都塔齊告稱二  
月初十日曾到準噶爾烏梁海宰桑瑪濟岱家  
據伊告稱此處所住烏梁海聞喀爾喀兵來將

擅入卡倫之人擒去又聞將在科卜多河所住  
之人逐往阿爾台以外又因都爾伯特達什之  
子訥默庫等與阿睦爾撒納一同逃來將烏梁  
海宰桑博貝屬下之人搶擄今若帶我等入戶  
往阿爾台以外雪大不能前往又正當阿睦爾  
撒納來路是以過唐努山往汗哈屯郭勒阿勒  
坦淖爾吹巴斯庫斯與俄羅斯連界地方居住  
查臣等前令和托輝特公青滾雜卜現帶伊旗

下兵出伊都克卡倫就近驅逐烏梁海今觀瑪  
濟岱之言東北之烏梁海俱已遠徙但不知真  
假今令青滾雜卜暫停進兵先遣人往探烏梁  
海蹤跡果係過阿爾台唐努山是實然後撤兵  
如仍在阿爾台唐努山左近即行驅逐奏入

上諭之曰據舒赫德等奏稱準噶爾烏梁海等已遠  
過唐努山徙至俄羅斯接壤地方居住再阿睦爾  
撒納與達瓦齊構釁阿睦爾撒納同訥默庫等俱

欲前來投順現在阿爾台雪大阿睦爾撒納未得  
前來等語烏梁海等現在被逐在阿爾台以外而  
又遇堵禦來投之阿睦爾撒納無處容身前往潛  
避至唐努山阿勒坦淖爾等處已屬窮困烏梁海  
人惟恐令伊遷徙耳今如准其投順後每年進貢  
減半不令遷徙自必傾心歸順前已降旨令薩喇  
爾辦理著將此旨仍交與薩喇爾等遵照曉諭妥  
協辦理

癸丑

尚書舒赫德奏報薩喇爾現在卓克索招降烏  
梁海今於二月二十四日臣舒赫德等亦赴卓  
克索會辦臣玉保往台吉策凌等游牧處辦理  
分立旗分編設佐領事務奏入報

聞

恩賞投誠台吉策凌等籽種羊隻有差

上諭軍機大臣曰據舒赫德等奏稱投誠策凌等馬

駝俱已疲乏而帶來牛羊亦屬無幾應令就近在  
推河拜達里克庫爾奇勒等處暫行種地游牧令  
麒麟保等於通肯呼裕爾等處可否居住之處查  
明再行移住等語策凌等始從遠處投降所有駝  
馬俱已疲乏若遽令遷移遠處駐劄殊非體恤之  
意應如舒赫德等所奏本年策凌等在推河拜達  
里克等處可以種地之處居住應需種地籽種令  
玉保麒麟保酌量向歸化城地方取用賞給至通

肯呼裕爾等處應否可以居住之處俟查明具奏  
再行酌定並著賞給策凌策凌烏巴什羊各五千  
隻策凌孟克羊三千隻以資養贍

乙卯

恩賞附近臺站供應馬匹蒙古人等

上諭軍機大臣曰北路軍營往返差人送事驛馬不  
敷例應就附近蒙古等馬匹應用此時差往軍營  
之人稍多臺路附近蒙古等各備馬匹供應公事

勤勉可嘉應加恩鼓勵著派副都統富德往返巡查戶部派員備持布疋茶葉酌量加恩賞賚以示優恤

丙辰

命公策楞赴軍營辦事侍郎兆惠協理一切事務舒赫德成袞扎布薩喇爾來京面領

諭旨喀爾喀親王額林沁多爾濟管理喀爾喀兵丁事務貝子車木楚克扎布公齊旺隨同策楞等



辦事

戊辰

命移軍營於烏里雅蘇台

上諭軍機大臣曰前因軍營無事額駙策凌年老就近以塔米爾作為軍營今有辦理烏梁海之事軍營應移駐烏里雅蘇台以塔米爾作為內地從前驛站設自推河至塔米爾今軍營既移至烏里雅蘇台自推河直抵烏里雅蘇台為便著傳諭舒赫

德成衮扎布將遷移驛路自推河直抵烏里雅蘇  
台之處定議辦理再軍營現貯米石亦著查明若  
添兵二三千名酌量支給足敷幾年之用一併具  
奏嗣經舒赫德等議於塔米爾鄂爾昆二處所存  
銀米軍器等項內將應運之物派叅贊大臣安  
崇阿原任巡撫永貴運至烏里雅蘇台鄂爾昆  
塔米爾所有綠營叅將守備千總各一員把總  
三員兵三百名俱移駐烏里雅蘇台大營再查

前因以塔米爾為軍營派參贊大臣一員給與  
印信駐劄烏里雅蘇台今大兵既駐烏里雅蘇  
台所有參贊大臣印信應暫行收貯俟辦理諸  
務既畢將參贊大臣移於卓克索等處展界駐  
劄另行定擬辦理至遷移軍臺查自張家口至  
鄂爾昆臺站四十四臺自鄂爾昆至烏里雅蘇  
台設立喀爾喀臺站十八處今軍營既在烏里  
雅蘇台臺站可直抵軍營道里較為直捷自張

家口至烏里雅蘇台道路今計現設臺站數目  
與應移臺站數目正足相當現派侍衛六格等  
及喀爾喀臺站台吉等查明舊設臺站地方及  
移設臺站由何處安臺應添喀爾喀官兵若干  
之處詳細查明酌量辦理再查軍營存貯米石  
現存米一萬五千餘石大麥四千九百餘石臣  
等現議喀爾喀官兵停其支給米石全給羊價  
銀兩約略計算若添兵三千名尙足敷一年有

餘支用奏入報

聞

壬申

準噶爾烏梁海額楞塞爾來降

命賞給安插如例

癸酉

上諭軍機大臣曰昨經降旨揀選察哈爾八旗兵五百名令侍衛永柱總管阿敏道帶往軍營調遣看

來尚不敷用著再派侍衛薩木都卜前往察哈爾  
地方會同總管等於八旗兵內再行揀選五百名  
即令薩木都卜帶往軍營

甲戌

上諭內閣曰朕於五月初六日起鑾往熱河七月初  
五日由彼起鑾巡幸吉林所有軍營應奏事件若  
照舊例仍進張家口出古北口行走紆迴徒勞驛  
站馬匹著派富德達松阿等自張家口外第三四

站起察看情形酌量定議安設臺站直抵熱河以便馳送軍營事務

命定議防秋事宜

舒赫德等奏言準噶爾頻年內亂至今阿睦爾撒納等相爭未定雖無力侵犯喀爾喀地方而防守不可稍疎臣等公同詳議現今烏里雅蘇台地方駐兵三千名俱經遴選

皇上又發察哈爾兵五百名前來由此項兵內及新

到察哈爾兵揀選二千名於五月初十日內外  
每人給馬三匹令臣薩喇爾努三貝子車木楚  
克扎布沙克都爾扎卜公青滾雜卜恭格敦丹  
等與薩木都卜公同帶領由控圭一路緩行牧  
放進至卓克索查驗準噶爾烏梁海如來至阿  
爾台以內舊游牧地方即速前進或用招降或  
行驅逐遵奉屢次

諭旨悉心辦理外計烏梁海事竣之後正防秋緊要



之時卓克索等處當庫列圖衝要之路將此二千兵即尋卓克索以內控主等路駐劄防秋再派叅贊大臣安崇阿副將軍貝勒策登扎卜領兵一千名駐劄庫克嶺等處防守索勒畢嶺布拉罕路其餘兵五百名並常駐劄烏里雅蘇台兵一千名令叅贊大臣烏爾登帶領輪班喀爾喀大員總辦兩路一應卡倫事務其每年應派防秋兵三千名停止駐劄鄂爾昆等處臣舒赫

德成衮扎布親率喀爾喀郡王桑寨多爾濟貝勒策卜登車蘇隆公齊旺等駐劄塔米爾烏里雅蘇台中間鄂爾海喀喇烏蘇等處接應各處之兵相機而行此項兵丁俱令於六月初旬齊赴軍營務選人才精壯器械整齊倘有草率塞責者即行嚴叅令各扎薩克明白通飭傳諭四部落外並將喀爾喀協理台吉章京等員內揀選材能出衆者以備差遣嚴傳各卡倫侍衛台

吉等加意瞭望探聽於七月底差我哨探兵往  
阿爾台山梁跟尋蹤跡俟雪降後將備調兵丁  
酌量撤回其每年豫備保護四部落游牧兵丁  
之處仍照舊豫備奏入

上諭之曰此次策凌等既來投誠又辦理烏梁海事  
務防秋尤為緊要是以朕昨降旨於察哈爾兵內  
再添派五百名發往現今舒赫德成衮扎布來京  
陛見俟至京時諸務再行面諭至伊等另摺所奏

喀爾喀兵丁軍器挑選好者留用其平常者俱行  
駁回辦理甚是但器械為武備要項何至軍前始  
行挑出駁回明係喀爾喀風俗弊壞平日漫不經  
心苟且塞責所致著將此嚴行曉諭各扎薩克嗣  
後有似此者必將該副將軍及扎薩克等從重治  
罪斷不寬宥再庫克嶺惟安崇阿與策登扎卜二  
人駐劄堵截尚屬不敷現在已令副都統德寧前  
往軍營至防秋時即著德寧與安崇阿策登扎卜

等在庫克嶺駐防

乙亥

命派喀爾喀兵丁防護策凌等游牧地方

上諭軍機大臣曰據麒麟保奏稱策凌屬人葉爾都  
因尋覓馬匹為喀爾喀人射死策凌烏巴什屬人  
巴啟齊倫率領其子潛逃現在嚴行緝拏其防護  
策凌等游牧乞調取鄂爾昆兵丁及扎薩克一員  
前來辦理喀爾喀人等偷竊牲畜甚至將人射死

目無法紀應痛加懲治著舒赫德策楞等嚴行查  
拏訊明正法並著派巴勒達爾總統照看扎薩克  
達什丕勒領兵一百五十名住於策凌等游牧用  
心巡查務使盜賊肅清其策凌等屬下人有逃竄  
者亦著舒赫德策楞遍行各卡扎薩克令其嚴行  
查緝拏獲之日即當詢明正法并將此旨諭策凌  
等知之

丙子

尚書舒赫德等奏請暫撤招降烏梁海兵

舒赫德等奏言據薩喇爾告稱準噶爾烏梁海  
宰桑圖布慎之鄂拓克聞已擒瑚圖克之信懼  
我兵威越過阿爾台海喇圖嶺往額爾齊斯地  
方雅爾都車根赤倫察達克四鄂拓克人等越  
過索郭克察罕烏蘇前往汗哈屯地方已於吹  
阿爾呼特阿寶哈卜齊海等處游牧宰桑瑪濟  
岱越過阿爾台唐努山間雅木圖嶺而去臣等

看得烏梁海等業已紛紛遠遁時方春令我軍馬力疲乏難以遠行且大兵若駐卓克索地方烏梁海聞知必堅守自固臣等公同酌議奏請暫行撤兵至夏季烏梁海等貪戀故土必仍回游牧彼時整兵速出易於收服再阿睦爾撒納來投之信聞之已久但係傳言尚無確信若遲至五月內其時阿睦爾撒納與達瓦齊相持既久勢難中立其來降之計必決臣薩喇爾與努



三留心察看情形相機酌辦奏入

上從之

戊寅

命於附近阿爾台地方增設卡倫

上諭軍機大臣曰從前定議原欲使烏梁海歸順准  
在原地居住如不歸順則逐出阿爾台以外今烏  
梁海等既由原處移於海喇圖嶺唐努山外阿爾  
呼特等處地方居住阿爾台以內皆成空地著即

於此處增設卡倫地方愈可鞏固如烏梁海思念  
故土復來歸順仍准居住否則亦易於驅逐現今  
軍臺侍衛員少不敷委用著再揀選侍衛四十員  
發往駐卡將現在卡倫侍衛兵丁移於新設卡倫  
居住其發往侍衛俱令住於舊卡倫巡查看守再  
辦理烏梁海事既有就緒即當將瑪木特亦飭令  
移徙著交與舒赫德成衮扎布不必發兵只遣一  
諳事之人往諭瑪木特因伊等上年擅入我卡所

以將烏梁海驅逐展設卡倫伊等游牧亦勒令遷  
移瑪木特聽從則已倘逾限不移即發兵驅逐現  
在兆惠亦起程往卓克索商辦事務著會同舒赫  
德成袞扎布遵奉朕屢降諭旨悉心辦理但須通  
盤計算現在兵馬力量果否可以進兵或須候察  
哈爾兵到時再定進止倘兵力尚在不足則俟舒  
赫德成袞扎布陛見後熟籌一切再行辦理

夏四月庚辰朔

命新降台吉塞卜騰留軍前辦事不必前赴熱河

上諭軍機大臣曰來降台吉策凌等一百六十餘人各求前赴熱河瞻仰朕躬但此內有台吉塞卜騰現在軍營辦理招服烏梁海事台吉塞卜騰人明白有材具朕早知之著於今年暫留軍營辦事令在叅贊上行走俟明年朕巡幸木蘭之時再行前赴瞻仰至策凌策凌烏巴什等遵旨於所屬人內選兵二百名令宰桑和通瑪什等率領俱交與塞

卜騰帶赴軍營調遣

丙申

議北路軍營運糧事宜

山西巡撫恒文等奏北路軍營運送糧米所有  
應行事宜謹條奏請

旨奏入得

旨軍機大臣議奏尋議據恒文等奏稱前軍機大臣  
奏准令於綏遠城所轄各城倉貯米石內碾米

三萬石運送軍營查托克托城等處倉貯米石  
碾運需時且費腳價請於綏遠城倉貯米石內  
動撥三萬石運往俟本年秋收時採買還項應  
如所議辦理其運送米石需用駝隻查扎薩克  
蒙古有豫備馬匹之事不便雇覓伊等駝隻車  
輛即雇歸化城商人駝隻車輛運送查雍正十  
三年原任尚書通智雇覓商人駝隻車輛運送  
米石並無遲悞此次運送應照恒文等所議雇

商人駝隻運送又奏稱現在軍營移駐烏里雅蘇台途次較前稍遠酌量地方給價查雍正十三年鄂爾昆運送米石每斛共給銀七兩今運送烏里雅蘇台加增十三站應每斛共給銀九兩八錢零查雍正年間需用蒙古牲畜甚多腳價未免稍昂今牲畜繁多非雍正年間可比恒文等照前計算未免過浮其作何節省之處應斟酌近日實在地方情形再行裁減又奏稱此

次運送米石照雍正十三年派副都統一員地方大員八員微員十六員兵一百名查綏遠城歸化城副都統各有應辦之事難以久懸請

欽點在京大臣一員照管運糧其撥派官兵即由該處滿洲土默特內派出亦應照恒文等所請總管大臣應由在京大臣內派往至歸化城與烏里雅蘇台相距寫遠水草不足難免牲畜倒斃應須豫為籌畫請撥銀二萬兩交派出大臣帶



往以備需用亦應照恒文等所請辦理奏入得  
旨依議著派台柱辦理運糧事務侍郎兆惠總理照  
看

丁酉

命公策楞為定邊左副將軍

己亥

命議處尚書舒赫德

先是奉

旨舒赫德此次差往軍營辦理一切舛謬從前行文  
準噶爾達瓦齊一事自應奏聞請旨遵行乃一面  
具奏一面即行擅發甚屬錯誤曾將應行察議之  
處暫令存記今令舒赫德等查奏原任貝勒額林  
沁公格勒克巴木丕勒未至調遣地方一案伊等  
公然為之奏請寬免此等奉調遲悞之罪軍務攸  
關豈得因其曾効微勞即從寬宥乎況此原係伊  
等應行查叅之事乃並未叅奏已屬寬縱及朕諭

令查奏復敢巧為開脫辦理舛謬已極著交部將  
伊前次存記之案一併嚴察議奏尋經部議請

旨革職奉

旨舒赫德著將從前所有加級紀錄盡行銷去從寬  
免其革職

閏四月辛亥

陝甘總督永常等奏報進

貢夷使敦多克等入境

庚申

命撥甘肅庫貯官茶一百十萬餘封派原任巡撫鄂  
昌前往會同地方官運至北路軍營以備賞賚  
定邊左副將軍策楞奏報偵探準噶爾情形

策楞奏言據本處烏梁海宰桑都塔齊遣人至  
準噶爾烏梁海宰桑瑪濟岱處探得從前原有  
宰桑二人在達瓦齊及阿睦爾撒納兩處彼此  
讒間今達瓦齊已將此二人殺死復與阿睦爾

撒納和好阿睦爾撒納已往見達瓦齊等語臣  
等竊思烏梁海懼我出兵或者妄造阿睦爾撒  
納與達瓦齊復相和好之言以緩我軍心亦未  
可定臣等惟有固防邊疆嚴守卡倫俟至五月  
即將辦理烏梁海展設卡倫各事宜遵照屢降  
諭旨相機而行奏入

上諭軍機大臣曰據策楞等奏稱達瓦齊與阿睦爾  
撒納業經和好阿睦爾撒納已往見達瓦齊其助

阿睦爾撒納之哈薩克兵五萬名俱已撤回等語  
朕思此等俱屬荒唐全不可信哈薩克各為生理  
並無總統之人無論不能聚兵至五萬之多即所  
謂阿睦爾撒給與達瓦齊業已和好亦非實語此  
明係準噶爾烏梁海懼我進兵驅逐伊等妄言伊  
內業已安定並無事故以緩我師耳策楞等勿遽  
以此為真惟當設法冀得實信留心辦理

甲子

命賜策凌等新編旗分為都爾伯特賽音濟雅哈圖  
部落分授策凌等為正副盟長

上諭軍機大臣曰我內扎薩克與外四部落及衆喀  
爾喀扎薩克地方各按旗分部落設立正副盟長  
管理游牧事務今將新來投誠之厄魯特台吉策  
凌等帶來戶口俱編設旗分佐領既與內扎薩克  
喀爾喀扎薩克等相同應將策凌授為盟長事務  
其盟會著賜名為都爾伯特賽音濟雅哈圖部落

已巳

定邊左副將軍策楞奏派喀爾喀扎薩克台吉  
等軍營効力人員

策楞等奏言喀爾喀扎薩克台吉等呈請願在  
軍營効力人員內除貝勒策卜登等已經奉

旨調取軍營差遣外餘二十四員臣等公同酌量揀  
派人材可觀之公策登薩木丕勒三達克多爾  
濟多爾濟策登親王得親扎卜之子一等台吉



齊旺多爾濟貝勒那木扎爾車蘇隆之子一等  
台吉旺親多爾濟二等台吉策登扎卜貝勒青  
滾雜卜之子一等台吉車蘇隆多爾濟二等台  
吉齊旺扎卜公額林沁之子二等台吉旺布多  
爾濟協理台吉多爾濟扎卜旺扎爾齊巴克四  
等台吉羅卜藏多爾濟敦多卜達瑪林等十五  
員俱請留在軍營以備調遣其餘公道玉特多  
爾濟等九員材藝平常應毋庸調取奏入

上從之

辛未

命封新降台吉塞卜騰為貝勒

先是傳

旨諭軍營侍衛永柱曰新降台吉塞卜騰已令在叅贊上行走帶兵前往軍營辦事今年不得前赴熱河瞻仰朕躬加以封爵若令其來京陛見伊未經出痘不便前來著永柱帶領塞卜騰至張家口至

時著大學士公傳恒往彼接見轉傳諭旨至是永  
柱遵

旨帶領前來

上命大學士公傳恒至張家口傳

旨迎勞並封塞卜騰為貝勒

五月壬午

命總督永常豫籌西路兵丁進剿事宜

上諭軍機大臣曰據永常奏準噶爾夷使已抵橋灣

現在即可入關且據該夷使言於起程時業已派出貿易頭目亦於六月間可到等語從前準夷部落准其通貢貿易原係加恩噶爾丹策零其後策妄多爾濟那木扎爾喇嘛達爾扎繼立因係噶爾丹策零之子孫是以仍前辦理至達瓦齊篡立則係伊之僕屬矣今伊貢使前來若仍前相待我朝當全盛之時國體攸關不應委曲從事以示弱於外夷若少示貶損準夷素性猜疑陰懷叵測將來

必至構釁滋事不得不先為防範況伊部落數年以來內亂相尋又與哈薩克為難此正伊處人心離散事會有可乘之機若失此不圖再閱數年伊事勢稍定必將故智復萌然後倉猝備禦其勞費必且更倍於今況伊之宗族策凌策凌烏巴什等率衆投誠至萬有餘人亦當思所以安插之道朕意機不可失明歲擬欲兩路進兵直抵伊犁即將策凌等分駐游牧衆建以分其勢此從前數十年

未了之局朕再四思維有不得不辦之勢所有明  
歲軍興一應糧餉兵丁馬駝均應豫為籌畫其西  
路所調兵丁約需二萬此內欲撥甘涼綠旗兵八  
千及西寧涼莊西安歸化城土默特察哈爾以及  
新降之厄魯特兵共合二萬之數如此辦理似已  
足敷調遣或有另行辦理之道著永常詳細籌議  
速行具摺馳奏候朕酌定將來十月內朕另降諭  
旨令永常策楞等來京將一應機宜面加訓諭

臣等謹案準噶爾獠狡兇頑流毒西陲諸部落貫盈將及未就翦屠實為

聖祖仁皇帝

世宗憲皇帝

兩朝欲竟之

遺緒我

皇上御極以來

審幾度務初猶許其請

安貿易暫示羈縻未議興師問罪之舉迨達瓦齊篡奪相尋衆心瓦解台吉策凌策凌烏巴什暨阿睦爾撒納等率屬款關內附戶口不下數萬人却之塞外既不足以彰

共主之仁處之緣邊又適足以滋藩封之患是必得其地而衆建之於計為便而揆其親離衆叛則於時與勢皆不可以不乘第

國家承平日久兵革不試衆皆狃於畏難之見



孰喻遠圖我

皇上秉獨斷於幾先力排羣議是以舉荒徼數萬里之地戡定於不浹歲之間皆由

睿算訐謨實有以決策於未事之先而後行師之捷赴會之神成功之速為伊古邗隆之朝所未有易曰天之所助者順也人之所助者信也惟我

皇上默契夫

卷二  
天貺之允符深維乎人謀之宜殫用能上下協應式集  
大勲成我

大清億萬世無疆之休永永無極也歟

戊子

命歸化城都統莫爾渾在軍營叅贊上行走

庚寅

命加都爾伯特台吉策凌等封號

上諭內閣曰都爾伯特台吉策凌策凌烏巴什等皆

準噶爾渠帥嚮慕德化率領萬衆傾心來歸甚屬  
可嘉應施恩賞給封號以示懷柔至意其台吉策  
凌封為親王策凌烏巴什封為郡王策凌孟克塞  
卜騰封為貝勒孟克特穆爾班珠爾根敦封為貝  
子剛巴圖孟克瑪什巴圖封為公達什敦多卜恭  
沙喇巴爾封為頭等台吉均授為扎薩克其所部  
人戶如何編次旗分佐領補放官職之處已俱降  
旨令玉保麒麟保等辦理著該部照例遵行策凌

卷二  
等受朕厚恩務將所屬人等約束教養安分謀生  
果能仰副朕心遵循訓旨則永沐朕恩於無既矣  
慎之無怠

辛卯

命策凌等入

覲於熱河

避暑山莊

賜宴賞賚有差

戊戌

命刑部尚書劉統勲協辦陝甘總督事務調福建巡撫陳弘謀為西安巡撫並理軍需

己亥

議西北兩路派兵事宜

軍機大臣奏言查西北兩路派兵之處臣等公同商議北路派兵三萬西路派兵二萬擬派京城滿洲兵四千黑龍江兵二千索倫巴爾虎兵

八千綏遠城右衛兵二千五百西安滿洲兵二  
千五百涼州莊浪滿洲兵一千寧夏兵一千察  
哈爾兵四千新厄魯特兵二千歸化城土默特  
兵一千阿拉善蒙古兵五百哲里木兵二千昭  
烏達兵二千喀爾喀兵六千和托輝特兵五百  
宣化大同綠旗炮手兵一千甘肅各營安西綠  
旗兵一萬共派兵五萬分為兩路遣往計每兵  
需馬三匹共馬十五萬除現在北路軍營所有

馬六千餘匹及交額林沁多爾濟採買馬一萬  
莫爾渾解送馬二萬外再令額林沁多爾濟動  
軍營餉銀於喀爾喀四部落買馬三萬策凌等  
帶來馬匹甚多著將官羊酌換馬一萬匹於內  
扎薩克六會盟處買馬六萬尚不敷馬一萬四  
千應令永常於綠旗營馬並孳生牧廠馬匹內  
照數揀派其北路所需駝隻約計一萬除現在  
官駝三千外交額林沁多爾濟亦動軍營餉銀

再買二千於內扎薩克六會盟處買駝五千其  
口食羊隻亦於內扎薩克六會盟處採買二十  
萬西路兵丁應需駝六千隻羊十萬隻除各營  
現在備戰駝三千二百餘隻近經寧夏滿洲營  
交鄂爾多斯等旗喂養官駝八百隻與孳生駝  
隻一併取用外若仍不敷交永常動餉採買其  
口食羊隻甘肅所管番子地方羊隻甚多且薩  
爾楚克海努克等項牛隻亦可應用亦交永常



動用餉銀或羊或牛酌量共採買十萬豫備其採買內扎薩克馬駝羊隻仍照前於

御前乾清門行走之王公額駙內分派數員前往會同各盟長採買其價值每駝一隻給銀十八兩馬一匹給銀八兩羊一隻給銀七錢不得浮用所有應派蒙古王公等職名伏候

欽定奏入得

旨依議著派齊默特多爾濟索諾木喇卜坦阿喇卜

坦多爾濟余木充扎拉豐阿哈穆噶巴雅斯瑚朗  
圖班珠爾喇什塞楞齊旺班珠爾喇什那木扎爾  
德里克旺舒克拉里達外添派鄂實白衣保哈清  
阿誠林永興巴爾品前往辦理採買馬駝事務

乙巳

命豫備收納降人阿睦爾撒納等事宜

上諭軍機大臣曰近有瑪木特約會阿睦爾撒納投  
誠之信伊等如來投誠即當安插在阿爾台以內

將我卡倫向外展放軍營向前安設一則易於收  
受投來之人稽查照管伊等游牧二則明年進兵  
路亦較近著傳諭策楞等妥協辦理至明年進兵  
時如有從彼投來之人應將四衛喇特議編四部  
封汗另居之處且勿向彼說知只將各按伊等等  
級分別封爵安居本地俱為大皇帝臣僕等語曉  
諭再朕聞阿睦爾撒納之為人詭詐反覆全不可  
信若果率伊妻子前來投誠說計亦無所施但防

範不可不周策楞等務須留心覺察謹慎辦理仍勿令其知覺

定分路駐兵事宜

定邊左副將軍策楞等奏言臣等公同商議除庫克嶺卓克索二處各派兵一千駐防外烏里雅蘇台尚存察哈爾兵一千名喀爾喀兵三千名並繼至之防秋喀爾喀兵三千名共兵七千名若令一處屯駐不但水草不敷而庫克嶺等

處去烏里雅蘇台甚遠緩急策應殊多不便臣等計其適中之地派兵一千屯駐布爾哈雅等處以為庫克嶺之應援入派兵一千屯駐西巴爾圖魯等處以為卓克索控圭之應援即令各台吉帶領前往餘察哈爾兵一千名喀爾喀兵四千名令於烏里雅蘇台附近舒魯克河哈克淖爾等處屯駐以備調遣奏入

上從之

丙午

議西北兩路派兵起程事宜

軍機大臣奏言明年進兵西路所派兵二萬名俱於明年四月內令至軍營方於進兵日期無悞但所派兵丁遠近不等且於明年春草未生時勢難趲行其索倫巴爾虎兵三千名相應交該將軍令於明年正月初十內前至京師自京師送至軍營應交直隸等省各督撫照遣往金

川兵例或用馬匹或用車輛自正月十五日起  
間三日令起身一次其由嘉峪關送至軍營如  
何豫備馬匹之處交與永常辦理其察哈爾兵  
二千名應令總管固穆扎卜帶領會同京師派  
出侍衛各員令帶四十日口糧乘今年秋令起  
程沿途收養馬畜前至推河等處時令將軍策  
楞等自軍營差人換給馬匹酌辦口糧送至西  
路駐劄哈密軍營其米石口糧由永常處辦給

新降厄魯特兵一千名即令策凌烏巴什帶領  
於四月內前去令赴西路軍營其阿拉善兵五  
百名交永常鄂昌派員照例辦理令公衮楚克  
帶領於四月底至軍營至西安涼州莊浪滿洲  
兵及甘肅各營安西綠營兵俱離軍營甚近應  
令該將軍等會同永常照例支給行裝口糧如  
期調集以備遣用奏入得

旨依議索倫巴爾虎兵著派三格納木球帶領西安



兵著派都賚豐安帶領涼州莊浪滿洲兵著派納邁齊努渾帶領甘肅安西綠營兵著派豆斌李中楷傅魁馬得勝帶領

軍機大臣又奏言調往北路兵丁三萬名務於明歲四月內俱至軍營方無誤進剿之期若將各處調來兵丁均於本年秋間起程前往不惟軍前馬匹口糧等項一時難以辦理且衆兵齊至糧米亦恐不繼若令明春再行前往路途遙

遠間隔戈壁水草乾枯牲畜疲瘦不能一時齊  
集臣等酌議京城兵四千名於明歲二月初旬  
起程黑龍江兵二千名於明歲二月十五內至  
京再行起程前往列於京城兵丁之末以五百  
名為一隊間三日起程一次其索倫巴爾虎兵  
五千名或應即於今年秋間起程或俟明年起  
程可以如期無悞應令該將軍速行熟籌定議  
具

奏辦理察哈爾兵二千名應給與兩個月口糧於  
二月初間起程哲里木昭烏達兵四千名若於  
明年起程四月內未必能到蒙古兵丁習於游  
牧不如乘今年秋間水草即令起程沿途游牧  
緩行擇煖燠之處過冬再行前往不但不悞進  
勦之期而蒙古馬匹亦不致疲乏應交與各盟  
長妥協辦理其綏遠城右衛兵二千五百名寧  
夏兵一千名歸化城土默特兵一千名及宣化

大同綠旗兵一千名均令該將軍都統督撫等  
照例辦理起程均限於四月內齊到和托輝特  
兵五百名令將軍策楞行令該扎薩克等辦理  
新厄魯特兵一千名亦令策楞處辦給賞賚交  
與親王策凌帶領前赴軍營以備調遣奏入得  
旨依議黑龍江兵著派達色鄂博什帶領索倫巴爾  
虎兵著派清保鄂爾袞察溫布帶領綏遠城右衛  
兵著派鶴山哈寧阿帶領寧夏兵著派和起海福

帶領察哈爾兵著派五什六帶領歸化城土默特  
兵著派阿爾賓帶領哲里木兵著派色布騰巴爾  
珠爾齊默特多爾濟拉里達帶領昭烏達兵著派  
額林沁阿咱喇朋蘇克帶領宣化大同綠旗兵著  
派福祿帶領

丁未

命賞賚派出軍營之喀爾喀王公扎薩克等

上諭軍機大臣曰從前派往出兵之喀爾喀王公扎

薩克等俱未經賞賜因出兵一事原為保護喀爾喀而起且與伊等游牧甚近無需賞賚此次派出喀爾喀兵六千名和托輝特兵五百名現因準噶爾投誠人衆令於喀爾喀部落內採辦羊隻牲畜接濟厄魯特口糧雖經給價恐於蒙古生計稍艱著傳諭將軍策楞等將派出喀爾喀王公扎薩克等職名開列奏聞照依內地扎薩克施恩一體賞賚



平定準噶爾方略正編卷二